







20
21
22
23
24
25
26
27
28
29
30
31
32
33
34
35
36
37
38
39

吉140
864
:2









古墨齋金石跋

卷二

琴士趙紹祖輯

男國楨校

晉立太公呂望表

盧无忌撰

八分書

太康十

年三月

文刻金石續鈔

右晉立太公呂望表盧无忌撰表後有銘八分書

猶有漢意余輯金石文鈔時取魏所立太公碑刻
之固疑穆子容撰文而尚氏錄盧表於前不知僅
刻其前半而尚有其辭曰以下銘辭如許也余友

崔雪堂繡官河南歸拓以見贈余喜而亟校之得
竹策之書魏碑作竹築發其潛書書之所出魏碑
書作盡皆大傷義理其他尚多闕文異字而此碑
中斷其闕者亦藉魏碑補之則亦有功于此碑也
晉孝侯周處碑 陸機撰 王羲之正書 大興二
年正月 文刻金石文鈔
碑文託之內史書託之右軍其最謬者孝侯以永
平七年戰沒而碑云元康九年舊疾增加爰捐館
舍陸士衡以大安二年爲司馬穎所害而文中有

建武元年太興二年之文顧亭林朱竹垞辨之詳
矣第竹垞因唐元和六年陳從諫重樹此碑疑文
字皆此君僞託而亭林謂不讀史者之所僞爲不

知碑後數行明載書碑

前試太常寺協
律郎黃某書

構造勾當
造廟

廿一代孫故湖州司息瓊副元惜宗錄
同晁宗典士琳惟良與諸宗子同共構造篆額平
華明素之人士先生偶未之見耳第碑旣自書其

名矣而前又何以託之內史右軍且文中有來吳
事余厥弟之言與史處師事陸雲相合則真若出
於士衡之口者竊意士衡本有是碑至從諫重樹

時已漫漶殘闕而周氏子孫無識零星補綴不無增添而未敢沒其舊名故載之于前而又列名于後如此不然其文頗依史事纂輯亦非目不知書者比而何以謬妄乃爾也今按此碑顛倒錯亂非一如叙孝侯在吳時事而曰朝廷謚寧不應空白而空白忠烈果毅一段不應在譖言之下梯山架壑一段不應在接戰之下處母年老一段不應在建武追贈之下知其以失次之文而妄爲聯屬任意增加爾若有心僞作則必不至是矣碑正書亦

道健可喜而另有一碑易作行書畧倣聖教其間書字稍有異同因論此碑而附記之

晉蘭亭序 王羲之撰并行書 永和九年三月

一國子監本

一類上本與黃庭同一石今存數十字而此本特完好

一東陽本後有正統丙辰兩淮運使何士英跋又有修撰張元忭序

一上黨本

一不知何本自第十行直裂至下卽從十一行樂也字下橫裂至末一行於斯文斯字之首余友宣州梅石居繡水盛春谷並珍賞之以上五本聯爲一冊其他尚有數種不入選

蘭亭自定武不可多見人多以意言之其實無佳本也何士英得一石於維揚石塔寺後井中以爲真定武本也然尚不及頽上以余論之監本謹嚴頽上流逸二者或頗得古人遺意東陽抑其次也

晉小楷黃庭經 王羲之書 永和十二年五月

一頽上本與蘭亭同一石今存數十字而此本特完好可愛

一潭帖本深穩過於頽上過華蓋下清且涼句下多入清冷淵見吾形其成還丹可長生下有華蓋動見精三句

一不知何帖本稍肥而神足意旺亦過于頽上或是潭絳諸帖中舊榻惜脫去七行不全以上三種裝爲一冊本金陵龔鹿樵家物後有錢竹汀跋

晉小楷佛遺教經 王羲之書 永和十二年六月

石今在吾涇縣民家後有永和十二年六月旦日
山陰王羲之書字又後附書法三昧一段亦有永
和四年十月十三日王羲之書字又後有文定公
家藏字上有文定公印又瑞文圖書下有敵國之
寶字又下有御府之印又下有懷充僧權字石理
粗而刻工惡不足爲美觀以未見有單行本存之
晉小楷孝女曹娥碑 漢度尚撰 無書人姓名
升平二年八月

文後書蔡雍觀碑事又一行云曷平二年八月十

五日記之當是右軍書也又後有元和十年十月

二日觀馮審字退思題字又後有會昌六年三月

廿八日翰林學士

闕似
韋字

踪將仕郎李

闕

隱同觀字

又後有癸酉歲九月十八日字下有滿騫懷充僧
權題名又後有

闕

成四年七月廿九日刺史楊漢

公記字末兩行去昇元二年正月九日瑯琊王氏
摸勒上石榻本似數百年前物每一展觀古香滿
室意此果爲昇元帖中之一紙尚在淳化閣帖之
前故精妙若此家藏翠墨以此爲冠

金石錄 卷二
晉小楷道德經 王羲之書 無年月

後有褚遂良跋云右道德經乃晉王羲之遺山陰劉道士書道士以鵝羣獻右軍者是也歷宋齊梁陳四朝今入秘府遂良脩員內省因得廁觀敬記其後貞觀十五年三月二十八日諫議大夫知起居注褚遂良書按遂良曾錄晉右軍王羲之書目首正書部五卷無道德經其第二黃庭經下注云六十行與山陰道士遂良旣以黃庭爲與道士豈復以此書爲遺道士也且云脩員廁觀謹記其後

而何得不收之正書部內也余觀此書雖結構勻稱易入俗目而肥而少骨稍帶俗韻殆非真蹟書與跋皆唐宋後好事者爲之耳

晉羲獻雜帖 行草書

右晉羲獻雜帖十八紙圓勁秀逸無美不備真宋榻也但潭絳諸帖今俱不存不知其當何本乾隆丙午遇旌德呂斗三於白門出以見示斗三好奕自矜因戲以黃庭數種相當睹而得之三日後斗三過寓見而有不忍之色余笑而書其後以還之

斗三名機善書

晉小楷洛神十三行 王獻之書

一元宴齋本前有吳門管一虬摹石字後有寶曆元年柳公權記又有天祐元年蔡續題祥符八年周越記

一玉版本前有晉中關令王獻之書字後有關和字

一不知何本其肥重似元宴齋而較生動以上三種彙爲一冊其他尚有數種不入選

苻秦鄭宏道修鄧艾祠記 八分書 建元三年六月

文刻金石文鈔

右鄭宏道等修鄧太尉祠記但自叙其所歷官而修祠祇以數語了之較之言不能文而刺刺不休者可謂直捷爽快矣碑八分書前半頗有法度後半自軍叅事題名以下極醜惡似出兩人所書以苻秦碑刻甚少而此又稍完故錄之

余刻金石文鈔時此碑關數字後見偃師武授堂億金石文字續跋作鄭能遠字宏道給兵三百下

金石錄 卷二
作又屠刀百五十人上郡夫下有施字支胡粟特
下有吝字凡余所闕者多具焉而授堂乃曰碑磨
蝕字跡不屬者何也蓋余之所得授堂又多闕耳
故論金石者各就所見言之不爲無益

苻秦諱產碑

正書

建元四年十月

碑極殘闕其可識者有曰維大秦建元四年歲在
戊辰十月一日有曰使持節冠軍將軍益州刺史
上黨公之元孫有曰扶風太守遷壽匡侯之胤子
諱產而不得其姓其後又有曰躬臨南界與馮翊

護軍苟輔叅分所理今所傳十六國春秋旣非真
本而遍檢羣書秦臣無名產者遂無以證明之

產碑陰

正書

碑陰所載姓名尚多可識而皆無顯人書極醜惡
特以苻秦碑刻甚少而收之爾

梁瘞鶴銘

正書

天監十三年

文刻金石文鈔

銘今存八十五字以全文較之不能半也此銘以
後爲前而古今著錄家咸未言及何耶銘舊在焦
山之下非潮落不能見故搨之甚難近自陳滄洲

鑿取置之寺前流傳較廣矣丙午之春余留焦山
三日親至碑下摩娑久之見其連絡數石零星補
綴而覆以亭因嘆好古之君子每爲古物之累而
斯恐不得復全其天年如曩日在水中時也後數
百年必有憶吾斯言而撫膺而恨者矣

梁吳平侯蕭景墓碑

正書字皆反書

刻金石文鈔

梁書蕭景字子昭高祖從父弟封吳平縣侯普通
四年卒詔贈侍中中撫軍開府儀同三司謚曰忠
此其表墓石也字皆反書結體遒勁祇書銜及謚

纔如後世之碑額爾以南朝古碑絕少故錄之

梁始興忠武王蕭憺墓碑

徐勉文

具義淵正書

無年月

碑殘闕已甚而余所得又以裝界失次不可讀然
以梁書對核之亦無甚異惟天監元年四月封始
興郡王食邑二千戶史作三千戶嘉禾一莖九穗
生于邠洲甘露降于府桐樹史紀嘉禾而未紀甘
露耳碑在江寧黃城村不知古今著錄家何以概
未之載

魏中岳嵩高碑 正書 無年月 金石錄有後魏中岳碑作太安二年十二月或是此碑

碑中段全無一字其年月與撰人名姓皆不可見或有以為寇謙之撰者今按碑有云會有繼天師寇君名謙似非謙之所自撰當是謙之曾隱嵩山立碑以言其靈異而當時信從如崔浩之徒者為之也

魏為始平公造像記 正書 太和十二年九月 碑方格陽文殘闕不可讀有曰父使持節光祿大

夫洛州刺史始平公奄焉薨 闕 又曰遂為亡父造

石像一區玩其文意當是始平公之子為始平公

造像也金石遺文以為始平公造像記誤矣未有

一行云朱儀章 闕 元達文字稍小不知是為此記

者否也

魏孝文帝比干文 正書 太和十八年十一月 文

金石文鈔

此太和十八年事也而其首云惟皇構遷中之元載者孝文以是歲遷都于洛故云元載也按史十

一月丁丑車駕幸鄴甲申經比干之墓傷其忠而
獲戾親爲弔文樹碑而刊之卽其事矣碑多別字
爲識者所嗤然魏世崇奉釋老而孝文獨留意經
術致敬先聖如史所記祀唐堯于平陽虞舜于廣
寧夏禹于安邑周文于洛陽是也又改謚宣尼爲
文聖尼父臨魯城親祠孔廟封崇聖侯邑一百戶
詔兗州爲孔子起園柏修飾墳壠更建碑銘褒揚
聖德惜其文之不傳于今矣而此幸而存者卽什
襲珍之亦不爲過而顧可以其字跡之多別體欲

鄙夷而棄之哉

魏穆亮造像記

正書

太和十九年十一月

文刻金石

文鈔

此魏邱穆陵亮夫人尉遲爲亡息牛楸造像記也
考史穆亮尚中山長公主封趙郡王徙封長樂王
後遷司空叅議律令例降爵爲公其文在陳顯達
攻陷醴陽之後文明太后馮氏崩之前史云穆亮
而記云邱穆陵亮者魏改邱穆陵氏爲穆氏見氏
官志而猶書其本姓不忘本也但亮旣以尚主封

金石錄
卷二
王不應云夫人尉遲又亮擊走陳顯達事在太和十二年時猶爲長樂王而亮爲司空在十三年太皇太后馮氏崩在十四年議律令在十五年然則亮之降爵爲公當在此數年之中而記立于太和十九年其官銜又不應書司空公長樂王也然史但云例降爵爲公文與上下不蒙竟不知以何事史之誤與或已降爵而猶竊其號以自銜與是皆不可知矣

又按金石錄跋弔比干文碑陰云自侍中邱目陵

亮以下同姓者凡三人字皆作目而史但云姓穆者皆有闕誤今按此記正作邱穆陵亮疑當時以穆目聲近通用非史之誤也

端木星垣曰按孝文本紀太和十六年正月乙丑制諸遠屬非太祖子孫及異姓爲王者皆降爲公史于穆亮傳誤書於文明太后崩之前耳文鈔謂降爵而竊號以自銜固然以例降爲不知何事而疑史之有誤則疏矣

按星垣之言最是特書之以誌余過 星垣名煜江寧人

魏浮屠惠猛墓誌銘

正書

正始二年十二月

魏書有云世宗以來至武定末沙門知名者有惠
猛惠辨惠深僧暹道欽僧獻道晞僧深惠光惠顯
法榮道長並見重於當世此惠猛卽其人也嗚呼
佛法之盛莫極于魏鑿山爲窟範金爲像正光以
後僧尼大衆二百餘萬其寺三萬有餘而沙門惠
始之死送葬者至六千餘人乃崔浩區區志存毀
滅可謂不量力矣然浩毀佛而崇道其中非有真
見至於嬰罪族滅自以刊載國史不慎且李順之
誅不無隱慝而史氏無識於浩非毀佛法歎息痛

恨以爲報應之驗不可怪與此惠猛者一無識沙
門耳而其文有曰昇帝床入紫幕朝英莫之預惟
師獨之亦可慨矣

魏馮种育等造像記 正書 正始二年

書極醜惡字形亦大小不等其中有馮黑退名黑
退黑闔聲之近蓋魏人多以此命名也

魏石門銘 正書 永平二年正月

銘首云此門蓋漢永平中所闕將五百載其中叙
羊祉賈三德共成開鑿之事起正始四年十月十

日訖永平二年正月畢功遙遙五百年中前後兩
度開通而紀年適皆爲永平亦一奇也碑又云皇
魏正始元年漢中獻地據史是年閏十二月梁行
梁州事夏侯道遷據漢中來降是其事矣

魏司馬紹墓誌銘

正書

永平四年十月

文刻金石續鈔

其前題云魏故寧朔將軍固州鎮將鎮東將軍漁
陽太守宜陽子司馬元興墓誌銘而首云君諱紹
字元興按魏書但云道壽長子元興襲父爵不言
其名紹亦不言其曾官固州鎮將鎮東將軍漁陽

太守也文雖但叙其先世官閥而元興之事無徵
然其名與所歷官亦賴此傳矣又魏書與北史但
言曇之爲司馬字後亦不言其爲欽之子也得此
誌而司馬氏自南而北其家世歷然可見

魏齊郡王祐造像記

正書

熙平二年七月

文刻金石

續鈔

史作齊郡王祐今按碑作祐字書祐音郭視也史
云祐字伯授於祐祐皆無所取義北朝書多別體
然祐必不可爲祐也

魏臨青男崔敬邕墓誌銘

正書

熙平二年十一月

文刻金石文鈔

按魏書敬邕附崔挺傳其所歷官碑與史畧同但
 史載敬邕爲脩和之弟而不言其爲雙護之子史
 言修和爲挺從祖弟則敬邕亦爲挺從祖弟而挺
 字雙根碑言敬邕之父雙護疑史於其世次殆有
 誤也又史謂熙平二年拜征虜將軍大中大夫神
 龜中卒諡曰恭而碑稱延昌四年爲是官以熙平
 二年卒加諡曰貞自當以碑爲是

魏兖州刺史賈思伯碑

正書

神龜二年四月

此據

金石錄書之

碑額題云魏兖州賈使君之碑雖甚殘闕然君諱
 思伯字士傑武威姑臧人其文尚可識也按史思
 伯有傳齊郡益都人碑當舉其族望方魏議建明
 堂思伯上議學者善之又以崔光薦爲侍講有謂
 之者曰公今貴重寧能不僑答曰衰至便僑何常
 之有當世以爲雅談惜碑存字數百無由與史一
 一相證也思伯爲兖州後徵爲給事黃門侍郎歷

官最久其卒也贈鎮東將軍青州刺史又贈尚書
右僕射謚文貞碑不當但題爲兗州賈使君而已
又碑有處土荒饑連歲不登及禮義用興之言似
爲思伯在兗政績此史之所無其或者爲兗人頌
德之辭立之生前者與

魏魯郡太守張猛龍碑

正書

正光三年正月

文刻

金石文鈔

碑云涼州刺史瓊之十世孫八世祖軌七世祖素
是軌之祖名瓊而今本十六國春秋前涼錄曰祖

烈與此不同又軌子有實茂而不及素皆賴此碑
以傳者也顧亭林云其陰書陽原縣義士州主簿
王人生造頌今按陽原爲陽平王人生爲王益生
卽在碑後非陰也

魏敬顯儁修禪靜寺碑

正書

興和二年

文刻金
石文鈔

碑搨本首三行爲鼠所嚙故碑題與姓氏俱闕然
碑有曰公泰平人田敬仲之後又云大丞相渤海
王委以經謀又云封永安侯拜度支尚書遷都官
尚書以北齊書北史參考之知其人爲敬顯儁也

金石錄 卷二
按二史皆云敬顯儁字孝英碑則闕其名而字顯
儁又名祇一字與史不同而碑叙顯儁所歷官爲
份州刺史轉晉州刺史拜儀同三司又驃騎大將
軍潁州刺史大都督史皆不書何耶豈以顯儁仕
齊而此皆爲魏官故畧之耶碑多異文而結體險
勁行筆峭拔寔爲歐陽蘭臺之所自出在諸魏碑
中尤卓卓者

魏李仲璇修孔子廟碑 正書 興和三年十二月
文刻金石文鈔

朱竹垞謂仲璇撰文并書者非也考碑文始末半
頌仲璇之功使出自己手必不爲此大約其門下
士所爲爾方魏崇尚佛老而仲璇又當喪亂之餘
奸權擅柄國步維艱乃能舉措從容不染習尚修
建廟像爲孔氏之功臣仲璇亦賢矣哉其文有曰
乃命工人修建容像又云所以雕素十子奉進儒
冠似夫子本自有像而十哲則仲璇叔置之也自
佛入中國始有像教吾儒祇作主而已今乃舉西
域之法施于聖人之門此自不學之過而特未可

以是爲仲琰責也至書字多別結體怪異則習俗使然尤不足爲是碑病爾

左春谷曰像設不自後世始也后稷廟所鑄金人見于家語越王命工以良金寫范蠡之狀而朝禮之見于國語土偶人與桃梗相語之說見于國策是塑像木像金像漢以前皆有之至夫子有畫像其來已久如漢文翁石室圖有孔子及七十二子像隸釋有孔子見老子畫像韓勅修孔廟後碑有改畫聖像之語而塑像則不知所始是碑云修建

容像則亦不自仲琰始也明張璠令天下學宮盡撤塑像而國朝邵長蘅有復孔聖像議亦未見其言之非也

魏武德義橋石像碑

正書

武定七年四月

文刻金石

續鈔

此魏于子建等造橋刊像記也子建行武德郡事而率其屬官不費民財建橋濟涉亦留心民事者其文有曰鵲起來官共治民瘼則爲頌美之辭而後又有粵余承乏謬廁官方之言似又爲子建等

所自作何也武德郡置于天平初孝靜爲高氏所
立遷都于鄴詔曰考龜襲吉遷宅漳滏碑云屬皇
朝遷鼎卜食漳濱遂方割四縣在古州城置武德
郡碑與史合也

魏安武縣開國伯等造像記 正書 武定七年十

二月

記頗殘闕今畧其文曰前使持節都督夏蔚二州
諸軍事衛將軍夏蔚二州刺史當州都督安武
縣開國伯父征西大將軍儀同三司行晉州事東

闕州鎮城安武縣開國侯張保洛征西將軍東荆

州刺史當州大都督東雍州鎮城永寧子劉襲假
節督東雍州諸軍事新除右將軍東雍州刺史當
州都督聞熹子薛光熾等敬造石碑像四佛四菩
薩藉此微功仰願先王婁太妃大將軍令公兄弟
等云云魏鼎未遷諸臣官皆不卑其但云父而不
姓者必魏之同姓乃顯然爲齊造像祈福以求媚
焉魏欲不徙爲齊其可得哉蓋不數月而遜國矣

魏立太公呂望碑 穆子容撰前半刻晉盧无忌文

正書無姓名 武定八年四月 文刻金石文鈔

此碑為太公裔孫尚氏所建前半刻晉盧無忌之
文後半為魏穆子容之文似子容作文時尚氏乃
取盧撰而并刻之也盧表云發其潛盡盡之所出
盡當為書此重刻時傳寫之訛若穆詞云一匡九
合懸車束馬作太公碑乃用齊桓事真可笑矣
北齊孔子廟碑 八分書 乾明元年
存字不數十其知為北齊孔子廟碑者以額有夫
子之碑字及碑首存乾明元年等字也

北齊高陽王浹碑 八分書 乾明元年四月 文刻金石

王為齊獻武第十一子史名浹碑書作浹按史所
記王不過一無賴子弟耳碑以駢語文之全無實
事令人讀之莫喻其人而其中有曰不得宮門莫
覩百官之富入其廊廟乃見禮樂之美擬不於倫
一至於此

北齊感孝頌 申嗣邕撰 梁恭之八分書 武平
元年正月 文刻金石文鈔

此胡長仁爲齊州刺史時經郭巨之墓感其孝而命頌之者也按史長仁字孝隆武成皇后之兄累遷右僕射及尚書令世宗崩參預朝政封隴東王和士開疾之出爲齊州刺史長仁怨憤謀刺士開事覺賜死夫長仁以帷幄之親預政封王不可謂不尊而不能守知足之戒與士開爭進倚親驕豪信佞爲亂以至于死其天性凶悖可知此去死期無幾耳乃能感古人之孝而營其邱隴表其庭宇可見至德所被雖凶人不能不格而性善之說萬

世不可易也碑後有隸書兩行較碑字稍小云居士慧朗侍從至能草隸世人稱朗公書者是也開府行參軍王思尚侍從能文有節不知二人託爲頌者附其名與抑後人之所題也然所謂侍從者侍從何人疑當時之所附爾

北齊造像記 正書 武平五年十月

碑僅上段行存十二字首云大齊武平五年歲次甲午十月而其中有捨茲如法之寶及畫出滿月之容等語蓋造像記也按金石錄有北齊賈羅侯

等造像碑是武平五年十月意者其卽此歟

北齊馬天祥等造像記 正書 武平九年二月

碑畫方格如棋局正書陽文凸起用筆與八分相
叅古茂可觀北朝造像諸記余收之而旋棄者多
矣其上有佛像者寺僧陳乞亦卷而與之不甚惜
而惟此記喜時時展玩之

周華岳頌 万紐于瑾撰 趙文淵書 天和二年

十月 文刻金石文鈔

頌文爲万紐于瑾造趙文淵書万紐于瑾者唐瑾

也文淵唐避高祖諱史作文深顧寧人朱竹垞二
先生博採史傳論二人事蹟詳矣然文淵此書亦
未脫元魏遺習而竹垞引史文深少學楷隸雅有
鍾王之則而謂非虛譽寧人引史太祖以隸書紕
繆命文深與黎景熙沈遐等依說文及字林刊定
六體成一萬言行於世而於此碑亦無貶辭殆好
尚之偏也夫時俗所尚雖豪傑不能無移余亦非
以此爲文淵責然魏孝文弔比于李仲璇修孔廟
二碑旣受指摘如彼而文淵此書乃蒙獎譽如此

金石錄

卷二

金石錄

卷二

二二

何耶頌有云太師大冢宰晉國公任屬阿衡親惟
且奭者晉蕩公護太祖之兄邵惠公顥之少子也
諷魏禪周廢孝閔醜世宗皆其所爲保定元年有
希護旨者曰周公德重魯立文王之廟於是詔于
同州晉國第立德皇帝別廟使護祭焉三年詔曰
自今詔誥及百司文書並不得稱公名以彰殊禮
蓋周改華州爲同州故護有事於華岳而使瑾爲
此頌頌中但稱晉國公而不名也此天和二年事
後五年而護誅矣

隋張夫人墓誌銘

正書

開皇四年九月

文刻金石
石文鈔

碑無書撰人姓名而正書遒勁時兼篆隸筆意足
以開歐虞之先聲近世甚重王居士磚塔銘對此
眞如婢見大人耳

隋晉陽造像頌

正書

開皇四年十月

文刻金石
文鈔

此劉瑞等造像于晉陽之重崖而爲此頌也頌後
列名有邑師邑主邑正邑主事邑人齋主像主檀
主化主經主清淨主光明主香火主道場主都維
那左維那右維那之類大約與北齊少林寺碑其

金石錄
鄱俚相同也碑祝聖上皇后儲宮晉王隋文帝五
子自儲宮外祇及晉王者煬帝時爲并州牧晉陽
其所屬也

碑有書銘人左維那道場主光明主烏丸下闕而
不得其名

隋立魏東阿王曹植廟碑

正書 開皇十三年刻

金石續鈔

此植十一世孫曹永洛等于北齊皇建二年奉詔
復廟至隋而始克樹石以紀成者也碑云蒙孝昭

皇帝恢宏古典敬立二王崇奉三恪據史事在皇
建元年而碑云二年者永洛等于二年始得奉詔
也碑正書體兼篆隸而不爲工文更冗雜當時無
學術者之所爲耳植封陳王而碑以東阿所立故
仍其舊封謂之東阿王碑

隋陳叔毅修孔子廟碑

仲孝俊撰

八分書

大

業七年七月

文刻金石文鈔

碑稱叔毅字子巖高祖武帝之孫高宗孝宣帝之
子而陳書諸王中無傳但言其未及封而已非得

此碑不知其入隋曾官曲阜令也又按胡三省注通鑑云唐人稱縣令為明府今觀此碑云則曲阜陳明府其人也是隋時縣令已有此稱

隋左屯衛大將軍姚辨墓誌 虞世基撰 歐陽詢

正書 無年月 顧亭林金石文字記作大業七年十月然此其贈官賜諡之日非葬日也

文刻金薤琳琅

都元敬跋云隋史不為立傳向非率更之書後世不復知有辨余按隋高祖本紀開皇十六年以蔡陽縣公姚辨為靈州總管突厥傳十九年遣大將

軍姚辨出河州以擊都藍又煬帝本紀大業三年三月壬子以大將軍姚辨為左屯衛將軍七年三月丁亥右光祿大夫左屯衛大將軍姚辨卒辨雖無傳史可謂脩書之矣元敬未之考也碑稱三年以母憂去官不言其為左屯衛將軍然于四年中稱右光祿大夫左屯衛大將軍如故是碑漏也余所得本係翻刻姑據而言之如此

隋淮安公趙芬碑 正書 無年月


碑甚殘闕其知為芬碑者以碑有云淮安定公繼



之矣公諱芬又云開皇五年除蒲州刺史加金紫
光祿大夫又云以大將軍淮安公歸第多與隋書
合也史稱芬爰演而碑有十一世祖融字稚長曾
祖瑔祖賓育其家世歷然可見又有府佐杜寬等
語皆賴以存者也

李靖上西岳書 行書 無年月

碑無年月宋紹興時所刻額云唐相衛國李公上
西嶽書真蹟而其書法乃出入于顏魯公爭坐位
及祭姪季明文二帖蓋世傳衛公多奇而宋人之

好事者偽爲之也附之隋後亦以厭其心云爾





Small, illegible text or markings in the upper right corner of the right page.

Small, illegible text or markings in the middle right section of the right page.

Small, illegible text or markings in the lower right corner of the right page.

